



B r o j : 02-04-1187/20
D a t u m , 28.12.2020. godine

ZAPISNIK

sa Prve konstituirajuće sjednice VII saziva Općinskog vijeća Doboj Istok

Prva konstituirajuća sjednica VI saziva Općinskog vijeća je održana dana 25.12.2020. godine u zgradi općine Doboj Istok u Klokotnici sa početkom u 10,00 sati.

PRISUTNI: 16 vijećnika, zatim Općinski načelnik Kemal Bratić, sekretar Općine Omer Hadžić, te predstavnici medija (RTVTK i Dnevni avaz)

ODSUTNI: Hasan Hasančević, vijećnik SDA.

Omer Hadžić, sekretar općine: „ Novoizabranim vijećnicima i Općinskom načelniku čestitam na izboru. Po Poslovniku o radu Općinskog vijeća Doboj Istok sjednicom predsjedava najstariji vijećnik novog saziva, koji će predsjedavati sjednicom Općinskog vijeća do izbora predsjedavajućeg Općinskog vijeća, a prema podacima Općinskog vijeća to je Mehinović Mehmed, te bih zamolio gospodina Mehinovića da zauzme mjesto za predsjedavanje.“

Mehmed Mehinović, predsjedava Općinskim vijećem: „ Koristim priliku da u svoje lično ime čestitam svim izabranim zvaničnicima vijećnicima i da zaželim svima puno uspjeha u radu i nadam se da ćemo raditi kvalitetno za dobrobit svih građana u Doboj Istoku. Svi znate da Općinsko vijeće Doboj Istok po Statutu općine broji 17 vijećnika i molim sekretara Općinskog vijeća da izvrši prozivku prisutnih vijećnika, kako bi utvrdili kvorum.“

Sekretar je izvršio prozivku vijećnika po spisku Centralne izborne komisije.

Omer Hadžić, sekretar općine: „ Konstatujem da je prisutno 16 vijećnika i da je odsutan Hasan Hasančević, koji je u izolaciji, tako da Vijeće može raditi i može se pristupiti konstituiranju u cjelosti. Od Centralne izborne komisije dostavljeni sljedeći materijali:

1. Uvjerenje o dodjeli mandata za vijećnike u općinskom vijeću, koji su osvojili mandat na lokalnim izborima 2020. godine,
2. Obrazac izjave o prihvatanju mandata i
3. Obrazac potvrde o prijemu Uvjerenja o dodjeli mandata.

te bih zamolio vijećnike da Uvjerenje o dodjeli mandata ostave kod sebe, a obrazac izjave o prihvatanju mandata i obrazac potvrde o prijemu Uvjerenja o dodjeli mandata potpišu odmah i iste dostave sekretaru, jer to treba u roku od 7 dana dostaviti Centralnoj izbornoj komisiji BiH. Vijećnici takođe trebaju popuniti Obrazac izjave o imovinskom stanju za izabrane članove organa vlasti koji će dostaviti Centralna izborna komisija BiH u roku od 30 dana od dana objavljivanja rezultata. Rezultati su objavljeni 15. decembra što znači da se moraju dostaviti do 15. januara. Vi ste dobili uputstvo kako će se dostaviti, a mi ćemo postupiti tako vezano za imovinske kartone. Dodao bih da kada vijećnici potpišu izjave o prihvatanju mandata možemo preći na dnevni red.“

Mehmed Mehinović, predsjedava Općinskim vijećem: „ Nastavljamo sa radom, jer sam dobio informaciju od sekretara da su potpisali svi koji su trebali da potpišu, a koji su prisutni ovdje. Ja ću iskoristiti priliku koju mi je omogućio Statut općine i Poslovnik o radu Općinskog vijeća da ovih 10 – 15 minuta vodim ovu sjednicu kao najstariji vijećnik. Naravno volio bih da se ne hvalim tom titulom i da sam najmlađi, ali valja prihvatiti takvo kakvo je. Nadam se da neće biti problema, jer se nisam posebno pripremao, ali obzirom da sam i prošlog mandata vodio ovu sjednicu mislim da neću praviti neke ogromne greške. Za ovu sjednicu je predviđen sljedeći dnevni red:

1. KONSTITUISANJE OPĆINSKOG VIJEĆA DOBOJ ISTOK

- a) Polaganje svečane izjave,
- b) Izbor Privremene Komisije za izbor i imenovanje Općinskog vijeća,
- c) Izbor predsjedavajućeg Općinskog vijeća Doboj Istok ,
- d) Izbor zamjenika predsjedavajućeg Općinskog vijeća Doboj Istok.

Da li prihvatate ovakav dnevni red? Ko je za?

GLASANJE: ZA – 16, PROTIV – 0, SUZDRŽANIH – 0.

Konstatujem da je dnevni red jednoglasno usvojen.

REALIZACIJA DNEVNOG REDA

- a) Polaganje svečane izjave,

Zamolio bih vijećnike da ustanu kako bi pristupili polaganju svečane izjave i da ponavljaju za mnom tekst svečane izjave:

“SVEČANO IZJAVLJUJEM DA ĆU POVJERENU DUŽNOST OBAVLJATI SAVJESNO I ODGOVORNO, PRIDRŽAVATI SE USTAVA I ZAKONA BOSNE I HERCEGOVINE, FEDERACIJE BOSNE I HERCEGOVINE, TUZLANSKOG KANTONA, TE STATUTA OPĆINE DOBOJ ISTOK, ZALAGATI SE ZA LJUDSKA PRAVA I SLOBODE, ZA RAVNOPRAVNOST GRAĐANA I DA ĆU U SVIM PRILIKAMA ŠTITITI INTERESE I BORITI SE ZA IZGRADNJU I NAPREDAK OPĆINE DOBOJ ISTOK”.

Hvala vam i molim vas da potpišete tekst svečane izjave i da ga dostavite sekretaru. Pošto ste potpisali tekst svečane izjave sada ste stekli prava i dužnosti vijećnika u Općinskom vijeću Doboj Istok. Čestitam svim izabranim vijećnicima i nadam se ćemo bez obzira na političku različitost raditi svi zajedno za dobrobit građana Doboj Istoka. Gledajući sastav ovog Općinskog vijeća vidim da je Vijeće dosta kvalitetno i da nas ima iz svih segmenata društva i nadam se da će građani Doboj Istoka biti zadovoljni sa našim radom. Iskreno se nadam da neće biti puno mimoilaženja, jer nam je jasno kakva je demokratija i da većina upravlja, pa molim i opoziciju da bude konstruktivna bez obzira na drugačija mišljenja. Donosit ćemo kvalitetne odluke i molim poziciju koja bude formirana da radi konstruktivno i da se radi, kao što sam rekao, za dobrobit svih građana Doboj Istoka. Čestitam još jedanput.

- b) Izbor Privremene Komisije za izbor i imenovanje

Zamolio bih sekretara Općine da pojasni dalju proceduru vezano za izbor komisije.“

Omer Hadžić, sekretar općine: „ Kao što je navedeno u dnevnom redu izbor Privremene Komisije za izbor i imenovanje. Znači prije pristupanja tajnom glasanju za izbor predsjedavajućeg

i zamjenika predsjedavajućeg Općinskog vijeća formira se Privremena komisija za izbor i imenovanje i ta se komisija formira vezano samo za ovaj slučaj. Vjerovatno ćemo imati do sljedeće sjednice kandidate da imenujemo komisije koje su predviđene Poslovníkom o radu. Vijećnici su dostavili prijedloge za članove Privremene komisije za izbor i imenovanje i to: općinski vijećnik Izet Hodžić predložio je Osmana Đonlagića, vijećnik Selmin Karić predložio je Nusreta Dautovića, vijećnica Zerina Subašić predložila je Samira Džanića i zajednički prijedlog vijećnika Mehmeda Mehinovića, Kemala Skopljaka, Senade Džanić, Karić Emire, Harisa Sinanovića i Adisa Halilovića za predsjedavajuće, zamjenika i člana komisije i za člana Komisije predložena je Emira Karić. Obzirom da ima više prijedloga glasa se pojedinačno po prijedlozima kako sam čitao. Od tri člana koji prođu bira se predsjednik koji će rukovoditi tom komisijom.“

Mehmed Mehinović, predsjedava Općinskim vijećem: „ Kao što je sekretar rekao imamo više prijedloga i trebamo za svaki pojedinačno glasati. Prvi prijedlog kandidata je Osman Đonlagić. Ko je za da Osman Đonlagić bude član Privremene Komisije za izbor i imenovanje Općinskog vijeća Doboj Istok?

GLASANJE: ZA – 10, PROTIV – 0, SUZDRŽANIH – 6.

Osman Đonlagić je dobio potrebnu većinu da bude član Komisije.

Drugi prijedlog kandidata za člana Privremene Komisije za izbor i imenovanje je Nusret Dautović. Ko je za da Nusret Dautović bude član Privremene Komisije za izbor i imenovanje Općinskog vijeća Doboj Istok?

GLASANJE: ZA – 10, PROTIV – 0, SUZDRŽANIH – 6.

Treći prijedlog je Džanić Samir. Ko je za da Džanić Samir bude član Privremene Komisije za izbor i imenovanje?

GLASANJE: ZA – 10, PROTIV – 0, SUZDRŽANIH – 6.

Zajednički prijedlog je Emira Karić. Ko je za da Emira Karić bude član Privremene Komisije za izbor i imenovanje?

GLASANJE: ZA – 6, PROTIV – 0, SUZDRŽANIH – 10.

Konstatujem da su članovi Privremene Komisije za izbor i imenovanje Osman Đonlagić, Nusret Dautović i Samir Džanić, a za predsjednika Komisije imenovan je Nusret Dautović.

c) Izbor predsjedavajućeg Općinskog vijeća Doboj Istok.

Izbor predsjedavajućeg Općinskog vijeća Doboj Istok, kao što znate, se vrši tajnim glasanjem u skladu sa odredbama Poslovníka o radu Općinskog vijeća i da je predsjedavajući izabran ukoliko dobije većinu glasova od ukupno izabranih vijećnika u Općinskom vijeću. Dostavljeni su prijedlozi kandidata za predsjedavajućeg Općinskog vijeća Doboj Istok i molim sekretara da ih pročita.“

Omer Hadžić, sekretar općine: „ Znači imamo dva prijedloga. Imamo prijedlog Jasmine Mešić koja predlaže Selmina Karića za predsjedavajućeg Općinskog vijeća i imamo zajednički prijedlog šest vijećnika koje sam već pročitao i oni su predložili Izeta Hodžića za predsjedavajućeg Općinskog vijeća. Za zamjenika predsjedavajućeg Općinskog vijeća predloženi su Izet Hodžić i Senada Džanić.“

Gospodin Mehinović je dao deset minuta pauze da Komisija pripremi listiće za glasanje.

Mehmed Mehinović, predsjedava Općinskim vijećem: „Završili smo pauzu i nastavljamo sa radom. Privremena Komisija za izbor i imenovanje je dobila spisak vijećnika i pripremljeno je 16 glasačkih listića tako da se može pristupiti izboru predsjedavajućeg Općinskog vijeća. Htio sam da glasamo odmah i za zamjenika, ali ispoštovat ćemo proceduru i prvo ćemo glasati za predsjedavajućeg, pa onda za zamjenika. Utvrdio sam da je glasačka kutija prazna i pozivam predsjednika Komisije da proziva jednog po jednog vijećnika koji će uzimati listiće i glasati. Glasat će se u kancelariji sekretara, a ovdje će se ubacivati.“

Predsjednik Komisije Nusret Dautović je pozivao jednog po jednog vijećnika na glasanje.

Glasanje je završeno i gospodin Mehinović je dao pet minuta pauze kako bi se izvršilo prebrojavanje glasačkih listića.

Nakon izvršenog prebrojavanja glasačkih listića gospodin Mehinović je zamolio predsjednika Komisije da pročita rezultate glasanja.

Nusret Dautović, predsjednik Privremene Komisije je za izbor i imenovanje: „Privremena Komisija za izbor i imenovanje objavljuje rezultate: glasalo je 16 vijećnika i svih 16 listića su bili važeći, što znači da nevažećih glasačkih listića nije bilo. Za Selmina Karića glasalo je 10 vijećnika, za Izeta Hodžića glasalo je 6 vijećnika. Čestitam Selminu Kariću na izboru za predsjedavajućeg Općinskog vijeća Doboj Istok.“

Mehmed Mehinović, predsjedava Općinskim vijećem: „Zahvaljujem se Komisiji na dobro obavljenom poslu i konstatujem da je za predsjedavajućeg Općinskog vijeća Doboj Istok izabran Selmin Karić i upućujem mu svoje iskrene čestitke. Zahvaljujem se na pomoći u vođenju sjednice i pozivam izabranog predsjedavajućeg Općinskog vijeća da zauzme svoje mjesto, odnosno da nastavi sa vođenjem konstituirajuće sjednice Općinskog vijeća.“

Selmin Karić, predsjedavajući Općinskog vijeća: „Prije početka rada poselamio bih gospodina načelnika sa saradnicima, cijenjene kolegice i kolege vijećnike i čestitao bih svim vijećnicima na dodijeljenim mandatima, odnosno osvojenim rezultatima na izborima. Nadam se da ćemo u narednom periodu sarađivati, a trudit ću se da se profesionalno odnosim prema obavezama. Smatram da će biti nekakvih neslaganja, što je normalno, ali ćemo na kraju uvijek donositi zaključke, jer kao i u prethodnoj tački uvijek mora biti nekakav zaključak koji će se nekome svidjeti, a nekome neće. Ja se takođe nadam da ćemo imati dobru saradnju i da ćemo biti konstruktivan partner načelniku i općinskoj administraciji. Još jedanput bih vam svima čestitao na osvojenim mandatima i prihvatanju mandata i nadam se da ćemo raditi ono zbog čega smo izabrani za dobrobit naših građana općine Doboj Istok. Nastavljamo dalje sa sjednicom.

d) Izbor zamjenika predsjedavajućeg Općinskog vijeća Doboj Istok.

Za izbor zamjenika predsjedavajućeg Općinskog vijeća Doboj Istok predloženi su Hodžić Izet i Senada Džanić i zamolio bih predsjednika Komisije da izađe, pripremi materijal i provede izbore za zamjenika predsjedavajućeg Općinskog vijeća.“

Predsjednik Komisije je konstatovao da je pripremljeno 16 glasačkih listića i pokazao praznu kutiju, te pristupio pozivanju vijećnika na glasanje.

Nusret Dautović, predsjednik Privremene Komisije je za izbor i imenovanje: „Za zamjenika predsjedavajućeg glasalo je 16 vijećnika i svih 16 listića su bili važeći. Za Izeta Hodžića glasalo je 10 vijećnika, za Senadu Džanić glasalo je 6 vijećnika. U ime Komisije čestitam Izetu Hodžiću na izboru na mjesto zamjenika predsjedavajućeg Općinskog vijeća Doboj Istok.“

Selmin Karić, predsjedavajući Općinskog vijeća: „Zahvaljujem se Komisiji i konstatujem da je za zamjenika predsjedavajućeg Općinskog vijeća Doboj Istok u ovom sazivu izabran Izet Hodžić. Ja mu čestitam i želim mu puno uspjeha u radu. Kolega, zauzmite svoju poziciju.“

Izet Hodžić, zamjenik predsjedavajućeg Općinskog vijeća: „ Poštovani načelnice, uvažene kolegice i kolege općinski vijećnici želim sve da vas pozdravim i poselamim i iskreno od srca svima vama da čestitam na mandatima koje ste dobili na lokalnim izborima. Nadam se da ćemo našu zadaću, koju su nam povjerali građani općine Doboj Istok, odraditi onako kako najbolje znamo i umijemo u narednom mandatnom periodu od četiri godine. Svima vama se zahvaljujem na ukazanom povjerenju i izglasavanju na poziciju zamjenika predsjedavajućeg Općinskog vijeća i takođe nadam se da neću iznevjeriti vaše povjerenje. Na početku obraćanja nisam pozdravio predstavnike sedme sile, iskreno ih pozdravljam i zahvaljujem se što su tu sa nama. Još jedanput iskrene čestitke svima vama i puno zdravlja, sreće i uspješnog rada, uspješnih odluka, uspješnih zaključaka u naredne četiri godine.“

Selmin Karić, predsjedavajući Općinskog vijeća: „Zahvaljujem se zamjeniku i sa ovim bi završili ovaj zvanični dio konstituirajuće sjednice. Zamolio bih predsjednike klubova da ostanu, pa da održimo Kolegij obzirom da bi trebali do kraja godine održati jednu redovnu sjednicu, jer imamo puno posla. Rekli smo da ćemo raditi u interesu građana i da ćemo biti društveno odgovorni i zamolio bih predsjednike klubova da ostanu poslije sjednice da održimo Kolegij. Želi li neko od prisutnih da se obrati?“

Kemal Bratić, općinski načelnik: „ Poštovani predsjedavajući, zamjenice, uvažene vijećnice i vijećnici, predstavnici medija esalamu alejkum i dobar dan. Želim prije svega da svima na području općine Doboj Istok čestitam na jednoj fer i korektnoj izbornoj kampanji. Kada se porede neke druge lokalne sredine mogu sa ponosom reći da je općina Doboj Istok politički sazrila i da smo, kao i u prethodnim izborima, vodili poprilično fer, korektnu i dobru kampanju. Naravno svim vijećnicama i vijećnicima želim da čestitam na izboru i nadam se da ću kao i u prethodnim mandatima imati dobrog partnera i da ćemo zajednički donositi i predlagati nove ideje i da ćemo zajednički donositi odluke za dobrobit građana općine Doboj Istok. Naravno na kraju svima vama čestitam nadolazeću Novu godinu i da vas, kako iduća tako i sve naredne godine, prate u zdravlju, rahatluku i veselju sa vašim porodicama.“

Selmin Karić, predsjedavajući Općinskog vijeća: „Zahvaljujem se načelniku. Ovim smo završili rad u današnjoj sjednici i zamolio bih vas da napravimo jednu zajedničku fotografiju.“

Sjednica je završena u 11, 10 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAJUĆI
OPĆINSKOG VIJEĆA
Selmin Karić

Službena zabilješka:

Zapisnik je usvojen na 3. redovnoj sjednici Općinskog vijeća Doboj Istok održanoj dana 28.01.2021. godine.

U Klokotnici, dana 29.01.2021. godine

Zabilješku sačinio
Omer Hadžić, sekretar Općine